

# Confeugo 2014

Sciô Scindico,

m'é cao aregordâ che a-i tenpi da Republica (de Zena, l'é ciæo) quande i patriççi s'acorzeivan che gh'ea tròppe personn-e a domandâ, s'amiavan inta faccia e divan: "Quante ghe veu?". Poi infriçciavan a man inta stacca e tiavan feua i dinæ per risolve i problemi da çitæ. Saiâ pe questo che o pòpolo o no s'é mai ribelòu a-o seu governo, ma solo a-i foresti che ne voeivan conquistâ: basta pensâ a-o Balilla e a-o Pitamû!

Atri tenpi, ma, ancon ciù che e palanche, quelli d'aloa ean gente che voeivan ben a Zena, che sentivan seu, che insemme a-o pòpolo se davan da fâ pe fala cresce, pe fala bella, pe fâ in mòddo e manea che chi a Zena se ghe stesse ben. 'Na civiltæ, 'na stöia, a nòstra, che ezatamente duxent'anni fa a l'é stæta serâ da 'na decixon ilegìtima do Congresso de Vienna, 'na stöia che, diggo mi, bezorieiva incomensâ a mostrâ inte scheue. No a caxo o Confeugo de quest'anno o l'é dedicòu pròpio a-i fæti do dexembre do 1814.

Atri tenpi quelli d'ancheu. Da quello che se leze e che se sente ne pâ d'ese abandonæ e pigiæ in gio pròpio da quelli che, pe-o seu ròllo, dovieivan pensâ a fane stâ ben. E senza 'n timon ch'o ne goidde seguio, ch'o ne fasse sentî òrgoliozi de ese zeneixi, cian cianin perdemmo a nòstra identitæ e no semmo ciù chi semmo, da dove vegnimmo e, sorviatutto, dove l'é ch'anemmo.

Compito stòrico da Compagna o l'é pròpio sto chi: mantegnî viva l'identitæ di zeneixi, saiva a dî de tutti quelli che veuan ben a Zena e a-a Liguria. Pe questo fondamentale o l'é l'agiutto de istituçioin, de l'ezenpio che saviâ dane chi ne governa pe riscrovî e nòstre tradiçioin, a nòstra stöia e a nòstra lengoa pe poei cresce tutti insemme (de l'ònestæ no veuggio manco parlane: chi l'é laddo o deve anâ in galea e basta!).

Ma st'anno chi l'é successo quarcösa de eceçionale. Sciben che Zena a l'é a çitæ ch'a pòrta e insegne de San Zôrzo, do Santo ch'o l'à amasòu o drago, niatri, zeneixi d'ancheu, no semmo manco boin a mette e brille a-o Bezagno e a tutti i atri riæ!

Eh za, sciô scindico, sciâ l'à acapio ben: son apreuvo a parlâ de l'aluvion! L'é 'n dovei aregordâ chi à perso tutto e chi con gran giamin o çerca de remetise in pê.

E inte 'na çitæ che, comme Voscià sciâ sa ben, a l'à gravi problemi de travaggio, ghe mancava solo questo.

Ma se no saiemo segui che fæti comme quelli ch'én successi no sucedian mai ciù, saiva a dî se no semmo segui che a çitæ a l'é stæta missa in seguessa, aloa con che cheu un o se mette a rincomensâ savendo ch'o peu perde torna tutto da li a 'n minuto? Chi peu, lascia perché no se sente tutelòu; e ògnidun ch'o lascia, ògni bitega ch'a særa, ògni inprenditò ch'o l'abandonn-a o l'é 'na perdita secca pe tutti.

Pe questo no veuggio mogognâ, ma, inte questa solenne çeimònia, chi davanti a Zena, a-a Compagna e a-e nòstre antighe bandee, domando a Voscià de spiegâ cöse s'é apreuvo a fâ pe dâ a-i çitadin a seguessa do rinborso di danni e a seguessa che 'n'atra bolâ de tempo grammo a no fasse mai ciù i danni ch'an fæto ste urtime aluvioin.

Tanti ouguri e scignoria a Voscià e a tutti. Pe Zena e pe San Zorzo!

Franco Bampi  
Presidente de A Compagna